

في العارضة

مطبوعات الفجر
31

شعر

سيد علي عبدالله

تقديم الدكتور يسرى العزب

مطبوعات الفجر
تصدر عن جماعة الفجر الأدبية بالقاهرة

المشرف على التحرير
دكتور بسري العزب

المراسلات باسم: المشرف على التحرير
الجيزة - أرض اللواء - فيصل
١١ ش محمد منصور
تليفاكس ٥٧٠٢٢٤٢

شكر وتقدير

أهديهما للفنان المتميز
أ. إبراهيم حنيطر
لتكرمه بإهدائي رسومات غلاف الديوان

المؤلف



الأهداء

بعثت عيوني تنقطف لك
نجومى، بنظرة العشاقان ...
من السماوات؛ عشان أعمل
عقود على صدر كالحنان
وأزعم لك صحاريك
وأنور لك لياليك
وأخلي الحب وأديك؛ ...
عجزت ...
ما كانش في الإمكان!!
فقلت: أضم أحلامي
على المرسوم في إعلامي
من الماضي

وفي الحاضر ...

وصوت مجهولي؛ في الناصر

- وانا نابت على الجدران

صور و حروف -

ف ... قلت أشوف ...

هدية تليق بروح العشق

عجزت

جمعت إجمادي

وقدمته في روح غرقان؛

هدية لبلي الشادي

(هنا) ...

... في موكب الديوان

تقديم

بقلم الدكتور يسرى العزب

لطيف .. ظريف .. حار .. حلو .. مز .. مر ..
حريف .. ساخر .. وشاعر .. مواطن حقيقي ودمه خفيف ..
طيب طيابة .. نصير للغلبة .. حبيب الصحابة .. وآخر
صباية .. وشعره ربابية .. وقلبه المراهق عنيف .. معلم
وطالب .. نسيم ريف في صيف .. كلامه رغيف .. هتاكله
وتشبع وهنتام خفيف .. وتحلم ببكرة .. وسيد معاك يشدك
بفكرة يقابلك ملاك .. يخلي الحقيقة الفظيعة رقيقة .. يشيلك
في شدة ويديك مخدة .. تسافر عليها .. عينيها تساعدك ..
تشوط وانت وحدك .. وتدخل بجون .
وهذا ما أحدثته معي قصائد (في العارضة) ..
فشكرا للشاعر الكبير - وإن كان هذا ديوانه الأول - ولن
يكون - لشاعرية صاحبه الغزيرة - الأخير .. عش يا سيد ..
ودعني أشوط معك ولن (نشيط) - صدقني أبدا .

د. يسرى العزب

٢٠٠٥/٧/١٣

هو الملك

سبحان اللى نشانا وخلقنا من العدم
وعلمنا القراية والخط بالقلم
وعلمنا المحبة و الود و التعاطف
وقيمة المشاركة في الفرحه والألم

*

سبحان اللى نشانا وقال للكون يكون
وأرضنا وسمانا خلقها بكاف ونون
وبكاف ونون خلقنا وبكاف ونون رزقنا
يا اللى بتقرا ورقنا أنا وانت؛ إيش نكون؟!

*

سبحان اللي نشانا ومكنا الوجود
وعلمنا الديانة - الواجب والحدود -
أمرنا بالأمانة حذرنا من الخيانة
وخلا من نسانا العاقر والولود

*

لو.. موافق

با حبك

وقلبي ما هوش

ملك حد

ومالناش في سهم الغرام أي يد

لو انت موافق

ف... قل لي : موافق

بلاش يبقى رأيك جزاير في مد

أحبك تعدي

و غصنك مندي ؛ ...

وإن غبت - برضو -

باحبك بجد

*

حاجة كُويَسة*

مبنى.. وباب.. وتلات وجوه بيعطوا مر العياط
استاذ جديد.. وولد وابوه والحزن من باب الاحتياط
المبنى ؛ مبنى المدرسة في أول العام الجديد
والعلم ؛ حاجة كويسة!! وسط الزحام ؛ ضايع شهيد

*

الأب ؛ يبكي على الفلوس اللي حتحرقها الدروس
والواد بيبكي من الكتاب عنده الكتاب زي الكابوس

* نشرت في جريدة الأخبار - العدد ٥٧٢٧ بتاريخ ٢٢ سبتمبر
٢٠٠٢

والترتيبات.. والمجموعات
يا ريت ؛ أنا وام البنات
والعفريتات .. بره وبعيد
(قطينا) في قطر الصعيد^١

*

الواد بكى .. وأبوه بكى
لو كان دفع؛ كان اشتكى!!
ماشي؛؛ المدرس يبكي ليه؟
اللي بيقض ؛ ناقصه إيه؟!
سألته ؛ قال الوقت ضاق
رئيس هراه الاختناق
والزحمة؛ مش حادث سعيد
م الزحمة.. في باب الحديد!

*

بين الزحام؛ "دايرة" ... هناك
عريس في وضع الاشتباك
و... باقى ع الزفة سنة
من حلمه بالابن الوحيد
قالوا؛ العريس قطع الخلف
وعروسته بتقول: "بالسلف ...
الواد حيتعلم يا (عيد)!!!

*

^١ القطار الذي احترق بأسرع مما يتصور إنسان وهو متجه إلى
أسوان وذلك في عيد الأضحى.

رحلة علي محيط الدائرة

بدأنا السير
وانا!! و النفس تاعباني ...
كما المسامير
وراعيني !
غيلان الليل ... ! ...
وجمالي ...
نسي جملي في حلم عسير ..
وفوقه قربة المية ..
وبيت الشعر ؛ ويا الزاد
وانا باسأل - يا نور عقلي -

إذا الجمال نسي جملي
ف .. قل لي ازاي ؛ حالف بلاد؟
وانا رجلي تاعباني
في رحلة ؛ ماشية في وداني ...
وانا واحداني ؛ مشي مالك
جناح يقدر يعطيني
عشان الشك في يميني ...
ما هوش طایل جناح الطير؟!!

*

هراني الشك ؛؛ والعنمة ...
بتزرع في النفس كتمة ...
تسد حناجر المواليد!!
بيتولدوا بلا أفكار ...
ولا أصوات ...
ولا مشاوير ؛ ..
عشان بيكونوا في الجنازير ؛ ...

و رجليهم على المسامير.
و في المطرح - ولا غيره -
عرق طارح مقاديره ...
و .. ري الزرعة لو يبقى من الحسرة ...
ما يبقاش خير!!

*

نسجني العنكبوت للموت ...
كفن محبوبك لليل صاحي ؛
ونجم الصبر مرمحي ...
و .. عمي ؛ اللي خطب أُمي
- وأبوي في التراب راقد -
رمانني باني واد فاقد!!
و ما اترباش !!
يا ريته عاش و رباني
- أبوي - ف عشه من تاني !!
و تاني هام ...
حيبقى بكام ...

كلامي ؛ والصخور نايمين ...

شمال و يمين؟!!!

*

ما فيش فايذة!!

يطول الليل ...

وأتمني يمر نهار

و أستنى ...

و جئة ؛ في الخيال بتروح ...

و تبعد ؛ كلّ ما باوصل لطرف الخيط ...

الاقى الحيط!!

بيصر عني الصراع المر ..

ولو بينسر كنت امشي ...

سنين العمر ، ما تتامشي ...

عيون الصبر.

لكن بامشي بدون فايذة

عشان (المنذرة) قايذة ...

بجزع ميراث .

أنا برّة ؛ وأنا صاحب تراب البيت ...
وبالمرّة - يا ريتني ماجيت - إذا
وجودي كما عدمي ...
لزومه إيه يدوب قدمي ...
وأنا بالهث من المشاوير !!
في آخرها ؛ الاقي شعاع !!
يفوتني ف لحظة المغرب ...
والاقي عمري كله ضاع ...
بلا ندابة أو مطرب .
وأرجع من طريق ثاني و ...
أتوه ثاني؟! !!
وأنا - و الساقية ؛ لو دايرة -
باكمل لفة الدائرة ...
و أرجع تور؛ ما بافهمشي !!
إذا حاتعب ؛ ف ... ليه أمشي
بدون فايده؟! !!

*

و جبت سرير ...
عشان أحلامي أملاكي
- على كيفي - و ملاكي ؛ ...
إذا عاوز أخدها نوم ...
أنام ...
وإن عزت أمشي ؛ أسير .
أسير في حلمي ؛ مش حلمك
وانا - لعلمك - ما نيش أهبل
لكن باوزنها بالمعقول ؛
أعيش حارس على جنونك
أو أحيا العمر مسجونك
لقيت السجن أحسن لي ...
إذا راح يبقى ويا الطير .
أنا ؛ مش قد مجنونك ...
ولا جنونك ...
ولا الجنازير !!!
*

سبب القلقاساية

إنّ ...

واحد من ثلاثة	في القراءة والدروس:
مفتري وسائق عباطة	بينما؛ في الشقطة موس
أو بتسكر م البطاطا	- وفرشتك بين التروس -
أو معاي؛ إمعاية	- لو كلاب تجري وراي-
يا ابني؛؛ سبب القلقاساية	وخلي بالك م اللصوص!!

*

هبييتي..

تبقى مين؟

غرامك "ميم" ما فيش منها
وفيها كل سر لطيف
و- وقت الصيف؛ على "صادك"
بيتهتي المقيم والضيف
و "راعك" ري للدنيا..
وحتى لو رضيعك كان...
...مريء عطشان على جرفك
وفوق ياقة قميصه السيف.

*

فروق بسيطة

سألني :

" علبتك أكبر؟! "

جاوبته ..

قال لي : " ليه بئشش؟! ...

وليه زيت الغريب يتباع ...

وزيتك صوت منامه بوش؟!

يا إما السر في الصنعة

يا إما عشان ببيجي "رخيص"

فهمت الرمز ...

(وقف الحال)

بيبقى ابن فرق الغش !!!

*

ساعة غروب

يا بخت صاحبي الضرير
وما شافش مجنون خطير
وما شافش عُمي القلوب
سرقوا الشرف والجيوب
ما شافش كوم الزبالة
نايم في وسط الحثالة
لما- في ساعة غروب-
بالبلطجة والرزالة

*

يا بخت صاحبي الأصم
ألفاظ تسمّم؛ تغمّ
باتمنى لو أبقى أبكم
وأموث حجر؛ يبقى أكرم
محسود عشان مش بيسمع
واشد من طلق مدفع
ما ليس في بحر القوالة
من عيشة سايقة الهبالة

*

اللي اتولد عنده عُذره
خلا الشيطان شد أزره
أبوه رماه للطريق
ورماه في قلب الحريق

و.. اشرب يا قلبي المواجه:
صار التلوث نجالة
يا الله يا "ريختر"؛ تعالى
دلوقت؛ صعب التراجع

*

أنا رحت أزور المقابر
لقيتني باحسد في (جابر)..
سأب البلا واستريح
لو جاز له يرجع؛؛ ينوح
واشوف - بعيني - اليقين
اللي رحل من سنين
من شغل زي البطالة
وانا باشكر الإستحالة!!

*

بارا لآمو*

كل أهل الحرب ناموا
والسلام (سلمون) و(تونا)
تبقى ويا ابن الحرامي
أما لو لك قلب حامي
والحصان بالـع لـجـامـه
والأدب في (جوانتاناـمو)
- للشيطان - قاضي ومحامي
يقتلك (بوتشـو) بسلامه

*

(بطلوا دا... واسمعوا دا)
والجنون أصبح شهامة
الدولار والنجمة عاموا
والكرامة.. تحت جزمة
إحنا بين جدران مقامة
حربنا - جوه البيجاما
دا البطل ساكن في دودة
والشرف أعداء لدودة
فوق محيط دم اللي ناموا
أو قفص في (جوانتاناـمو)
إنما؛ من غير مقام
خسرانينها بالـكـلام

* نشرت في مجلة (صوت فلسطين) - عدد يونيو ٢٠٠٣.

يعني؛ حتى "الحشتا بشتك"
والله باقي ف وسطه أستك
- في الهوا- خلص كلامه
يقلعه ؛ في (جوانتانامو)

*

كان يوم اسود - يوم ميلادي -
لما موتني أمر عادي
إيه فاضل لي يملا خوفي
والعذاب في "نيران ذكية"
لازمته إيه الميلاد؟!
وللكلاب أعياد ميلاد
بالأمان؟؟؛ والخلق ناموا
أو قفص في (جوانتانامو)

*

صاحب الأفعى.. يا.. (نقعة)؛
راية سمّ وكفّ صقعة
فين نباح الكلب يا أمّه
والفرس والسرّج لما...
اللي جات- من الغرب- رابعة
توضع الهلف في مكانه
لو قدّم - في الحيّ - هامة
فين قرونك، يا (غانامو) ؟ !!!

*

ميكروباس كفر المبل

يا .. ليلى ع القط المواء ؛
لما يقول : واء ...
و جحيشة الواد السواق
كارو بخيره
بتحب في الخط حميره ؛ ...
و ما فيش غيره ..
صبي "النور" ...
كثر خيره ؛ جاب الفلاشين !!
جاب "الفلايش" ؛ فلشينها القطر الخايب
عدى القناية - على حماره - المقلوب
في الطين.

و لا عادش تيس - بعد المعزة -

جات له التغزة ...

في القلب سمكه بتتدلع يا أبو قلب سميك

وانا من زمان طالع نازل؛ راكب ؛ ماشي...

و باحدرك ، علشان غاشي بين التلاكيك.

لما العجوز ياكل بعضه ف قلب الزحمة...

من غير رحمة ...

حيقولوا إن العنزاية كلت السيراميك.

حبيبي ؛ يبيع في المترو

الكربون مغشوش...

بالهوا مرشوش ؛ ...

و .. وجوه كتيرة مكر بنها سوء الأخلاق.

يا ... حلو ؛ يا بتاع "الكامبي" ..

إقعد جنبني

النملة - في الليلة البمبي - كلت الأوراق

بكام حتاخذ مرتبتي؟!!!

أنا مستتي ...
و غصب عني راح ابيعها
و بص لقدام
مع إني حاخذ كام جلة
ب ... سوط الفردة ...!!
ليه يعني كوز أنفلونزا؛ على لتر زكام؟!!
هو الطريق كدا ليه فاضي؟!!
و فين القاضي؟!!
علشان يفك البرشامة من راس (برشام) !!!
توصل منين؟!
و دي معقولة؟!
فهمت الفولة !!!
ع الحال دا تفضل مقفولة ...
و الله يقويك .
فإذا انزقت على الشتير ؛ روح اتمبر ..
و انبط ؛ أحسن تتدمبر ...

لو صاح (الذّيك) .
قال إيه ؛ يا ست أم " نجية " ...
البت " بهية " ...
بتقول لي عنزة " عجمية "
بتاكل كواريك !!!
أنا مالي يا اختي بحلاقك
والا القرعة ؟ !!
لو السّمك ساب الترعة ؛
إشوي الثّماحيك !!! .

*

حليب المكاهل

مين اللي حيغسل المية
من الكف اللي بتقرّف
و أهل الكذب لو باحوا
عشان الحلم يتصرّف
و سلطان الهوى مسلطن
عشان الغيط بيرمي حشيش
ولا عاد الحليب أبيض
ولا حلاية بتشرّف؟؟!!

*

الريحة .. مش قوي

أنا با عشق الحكومة
علشان مزنوق قوي
لو انا قشر، تبقى "حومة"
وانا- أصلا - مستوي
حمامات الخديو
حذفوها من الطريق
فهمت والالسه
الريحة مش قوي!!

*

فراشات النار

و .. ما اقدر شي ...
يجيني الشوق ؛ و انا بامشي ؛
لا بد أطيّر ...
بكعب حرير ؛
على رمشي ...
أعدي البحر ؛ بالخاطر ...
وانا مخاطر ...
وما يهمش علو الموج
ولا حتى نافورة حوت
ساعتها ؛ أموت ...

إذا راحت ثواني بلاش ؛ ...
و صوته ما جاش ...
لأن الخطوة مش كافية و كان
لازم لي توب من ريش !!
حاطير بالروح ؛ وما استنش !!
أنا ...
روحي طيور الحب ...
لما الحب يبقى سمير ...
لليل القرب ..
بعد البعد ما يسافر
لحب أسير ...
يسير بشرا ع يداوي الريح ؛
كما الورداية للمجاريح ...
على شهده ...
على شوكه
على إخلاصه و شكوكه

على أحلامي ...
لو هانت ؛ ...
أسافر له على المعاذير !!
إذا المعاذير ما كفتشي ...
أجرب ؛ أمشي ع المسامير !!!

*

مش حكاية قماش

لو كان تلتينه إسود
والتلت الباقي دم
والنسر و البيضاء
هاجروا ؛ والشر عم
لساه البدر صافي
والورد ليله دافي
ف ... الحلم؛ إن كان خرافي ...
قلمك ؛؛ هو المهم

*

شوطنة

ضربوه و فروا
بحصان و كارو ...
ولا حد سيعرف ؛ فين الجماعة ..
في أنهو حنة ...
وف أي ساعة!!
ولوتحروا ؛ لكانوا قروا ...
إن الحدادي بتقول ولادي ...
عبال ما هومشي أصلا - يادادي -
أشبال رجولة ...
والبننت غولة ؛ هبله وعبيطة
والواد مهوتر و دماغه طيطة

شال الهباله فوق السويتز
صورة غزالة ...
والدنيا .. بمبي ...
وإن كنت راعي ؛ تعالى جنبي ...
دا الراعي واعي ...
وانا ضاع صباعي ...
عمال أشاور ، واقطع دراعي ...
لو كنت فاهم ؛ مين اللي ساهم
في جسم شركة تنتج حدادي ...
فين الأيادي و الجو هادي
و النمل عامل والنوم " فؤادي " ...
راسمة مصخر ...
حلو الجماجم ، لما تبخر ...
فكر الجماجم ...
هات المعاجم ؛ الكلمة دارجة
والقرد عامل حياته فرجة

الدنيا وردي ...
إرقص يا قردي!!
هز الحكاوي ، تحت الغناوي ...
ويا الدبابة ...
وارقص يا بابا
الكل " شنكل "
و (زيون) يا (تلفو)
شايبين و خابوا
رضع و تلفوا
من فوق هواي ؛ حطوا الحوايا
و عاد أمامي يشبه وراي ...
والدنيا دايرة ...
والفكرة حائرة ...
مين اللي يكتب ؟ فين الدواية ؟!
وجسمي شقق .. و فين دواي ؟!
فين اللي يقرأ ؟!

مين اللي يسمع؟!
ما فيش يا (جاكسون)..
سوى كلاكسون ...
في الودن يرقع ؛ دخل نافوخي
- وأنا فوق غيايبي - بعيار صاروخي
وعيال بتجري ؛ كتاكيت (ديابة)
بسنان غلاية على بحر (ضادي)
النص فاضي ... و النص فاضي
والتبن حكمة .. و الخرج قاضي
في وقت ؛ ابن البارومة بابا ...
واللي يربي فاقد مهابة
غير شي مشاتل ...
وحب فاشل ...
نجح له مدة ؛ والجوشدة.
ما تسييش عاقل محتاج لعدة
بيحث له مدة لاجل يلاقها ...

إلا وترسم عليه عينيها ...
يلزق في قهوة ، يحلم بشقة
وعقد (عرفي) ... ولو بدقة ...
تمشي المسائل ؛ والليل قوالح !!
ما تقول لي رأيك يا (عم صالح) .
عمر يا " ضرسي " ...
إديها كرسي ...
نهار (مقولح) ما لو ش ملامح ...
سنان في سوسة على وش كالح
بيقول يا (سيكا) دا العمر لحظة
ولو حبيبك عيونه جاحظة ...
ونفسه مرة في العمر يحظى ...
بالكندو ... إيشن " !! فيه ألف
" نيشن " مش لاقية عضمة ورغيف
بـ " سوسه " ...
ولا كف لين علشان تبوسه

إحنا - النهاردة - ما احناش في
حالة تسمح بـ (عيشن) ...
العملة حنجل ؛ مربوط بـ .. تمبل
بين الضواري ؛ محتاج (فيراري)
يعمل به راجل ؛ في وقت آجل
أوراقه خضرة ... أوراقه حاضرة ...
كلامها حكمة ...
فين التفاعل؟! (أبو مادنة) سافر
ولا عاد له خاطر ...
ضيع حياته في خطوط طويلة
لا عاد له قطنة ولا عاد له تيلة
كله بيسعى ...
على نمرة تسعة ...
جوه (السرايا) ...
إجري وراي ؛ إقطع و عدي
نصرف معاشنا على قبر جدي

يا عقل برجه ، طائر ...
بترجو ...
لو حد فاق لك ؛ صحنيني دوغري ...
على شيشة حمي أو عرض مغري
أو جو سالك فيه لقمة سهلة ...
من بغل ريفي أو حلوة جاهلة
والدنيا تبقى في الصبح فلة ...
والليلة حمرا والحب شلة
وسلام يا (كوكو)
لو حيشوفوكوا ؛ بعدين معاي
نعمل حكاية ...
والدنيا ساقعة والنعل حافي
إوعاك تقول لي : دا البرش دافي!!
كذابة بنت اللي خد لحافي
كذاب أبوها ...
ودانا قره ...

في داهية سودة ؛ ولا شقنا بره
والواد في همه ...
ساكن بدمه ...
لما نصحهم ؛ ضربوه وفروا
خليك في دروة ؛ يمكن يمروا
مش راح يفوقوا
من أسر طوقه
لو كانوا فهموا كانوا تحروا
خليها ما شية بصاروخ حشيشة
أو طير بريشة
أو حتى شوطة ...
" الكورة " تحلا لو جاتها (شوطة)
تاخذ (مغاوري) ...
والصبر دوري ؛ ماسك عروقه
إبن الملاحظ ...
لص المحافظ ؛ إكفينا شره

الجنة بايظة ... ؛ مش قد حره
لو فهموا ناسه ...
كان - من أساسه - فهم قطاره
مين اللي جره ...
لكن سلامتك ؛ لو شفت نومتك
بين نحل عامل وناس يعرفوا !!

*

يا ... من يعيش

عتاويل ...
في (كالي - فوور - نيا)
كلوا فرنيا ؛ ...
وما عادش عيش
و "قابيل" لبد ...
في الأغنية ...
وفي التعزية ...
وإنيا طيش ؛ ...
بيقول لمن نام في الدرة
أو في الدرا :
يا عنتره ؛ ...

مين اللي قدم البتاعه وآخر

الحصان ورا ؟!

سؤال ...

ما هوش - في الأصل - عايم

إنما مسئوله نايم .

حلمه تايه في السما

لما رد بهمة ؛ ...

الحلم حام على غممة

قال :

" يا صفيه ؛ ما تفتريش ؛

نامي بقى ...

دا الليل سري "

وكلامنا مات في الحنجرة!!

" و .. يا هل ترى ؛ ...

ينفع تجيب بيضتين سمك ...

لو بيض فراخك كان مافيش؟؟"

دا كلام صفية

ف ليل شكوك ...

قالت لجوزها :

"إحياة أبوك ... "

- ولو إن دي حلفان غلط -

" هات ؛ وانت جاي ...

سكر و شاي ...

واوعاك ؛ كما ديك النهار

... يدوك نشارة على الفطار

... وكفاية ؛ في الجبنة القريش

الورد نام ويا الحشيش ...

جوا المشنة و ...

كات له رنة !! "

" قام فز - من قهره الجدع -

قام و اضطجع ...

وعيونيه بحرین من شرار ...

قال :

"بالنهار

- يا صفية - لوجانا النهار

... نامي بقى ؛ ...

كفاية المرار "

ولسته حترّد القوالة ؛ ...

وابتدا لعب الغزالة في عينه ؛

قامت طبطبت ...

على كتفه ؛ و الخوف بان له ريش!!

قالت :

"وما له - يا خوي - نام ...

والصبح تبقى ... (!)

يا من يعيش " !!!

*

مدارس الجواسيس

في يوم بيصارع الكوابيس
و.. صباح بيحذف العتاريس
على ناس ميته وماشية
لاهم إنسان ولا جواميس
بتبقى الفكرة مطروحة
عشان تتحط على اللوحة
حرس على عميا مجروحة
يربوا ف حجرها الجواسيس

*

ضفاير الصفايف

صفصافة ... ؛
و مصففة ضفايرها
فوق النيل ؛ ...
فردت شعور الدفا
- وكان الهوا بيميل -
الليل همس للقمر :
" مين دي ؛ يا بدر
الليل ؟!
قال له :
" دي لحظة صفا ...
تتغنى في المواويل "

*



و... هات يا صويت

ورايالـ ... (هو) .
سيب الكم يا كلب الغبار !!
يا شاويش !!!
ما فيش فايذة !!
و .. فايذة ما فيش !!
تقدمها ؛ تأخرها ...
تطبلها ؛ تزمرها ...
ما رايح يبسط " الموميا " ؛
لا وعد كذوب ...
ولا الترويش .

*

وضاعت سكة الدراويش ...

و جاك الدش !!

ولما يوش ...

تزغر له بقرش حشيش ؛

ما يتهزش !!

تجيب برسيم ... ؛ ...

ما ينجزش !!

تتام ؛ ما ينام ...

و إن جالك ...

- على بالك -

(طواريء) ؛ يبقى إسهالك

- في أحوالك -

كما الإمساك !!

ولما تتام ؛ تتام صاحي ...

وسيع العين ؛ كما الأسماك !!

تعيش (الفيلم) بين الريح ...

و مستشفى ملان مجاريح ...
و إبرة ناشفة ؛ بنت حرام ...
في بيت العضم كالعضة !!
و تنقضى ؛ ...
عشان ما دفعش ليه حينام؟!
تدق مسلة في مخدة ...
سرنجتها كما المسمار ؛ ...
و (خشب الورد) متجنن على " بسمه " ..
و .. موت يا حمار ...
إذا طيف المنى الابيض ...
يعود له طيفه م الجنة!!
بعيد عنا!!!

*

بعيد عنا ...
لأن الرسم بالمجموع
كفاية ؛ و ...

سك ع الموضوع
كفاية ...
الفتة للفظافيط .
و مهما يتقن التتطيط ...
حمار ؛ زمار ...
بينفخ ويا قرد عبيط ...
على (المسمار) ...
عشان قال إيه ؛؛؛ يجيب بطيخ ...
من الصواريخ
- في أفلامه -
يصحي المر من (سامه)
عشان يتسلى في الفتافيت !!!

*

و ... أهم ناموا ...
- ولاد الهرمة -
في الإخراج !!

ما عادشي يآثر (الحلاج) ...
ولا (الخيام) ولا (الزجاج)
وانا - يعني - ...
عشان أعني ... (!!!)
وخلفي داير التخييط ؛ ...
با قول : " يا علاج "

*

بلاها " حديد " ...
بلاها ابراج.
بلاها وحلة المساخيط
بلاها فارة النجار!!
بلاش (إبرة) ...
و بلاش الخييط!!
و إن كان الولد فاهم ...
ويطوف الهرم بـ .. حمار ...
عشان لقمة ؛ غموسها عبيط ؛ ...

و لابس خرقة التخطيط ...

وماثنية معاه ؛ ...

ما يجرأشي ...

... ، ... ، ... ، ...

كفاية ع الحمار السيط!!!

*

القشطة والطّين^١

فعلا ؛ الراجل زباله و(الهوى) حرق الغلاف
هو راسه قلقاساية و.. هي (آه) ؛ تبلعها حاف
هو ؛ بطنه بطيخاية في نفق مالبينه غاز

*

إبتسامته جحر تلعب والعيون ؛ مالهومش وصف
والودان حميري خالص والجفون محتاجة رصف
أنفه سحارة مجاري والسنان عدم انحياز

^١ باعتباري مواظبا على التواصل مع مجلة "كاريكاتير" - كقاريء مخلص - لم يفتني تسجيل شعوري تجاه غلاف العدد رقم (١٩) - ابريل ٢٠٠٤ والذي أطلقت عليه هيئة تحرير المجلة (عدد زباله). لقد راعني بشدة تصوير الفنان "مصطفى حسين" - بريشته - التناقض الخارق بين جمال امرأة تفتن الطفل في مهده، ورجل يصاب من شكله صندوق القمامة بالغثيان، وكلاهما يسيران جنبا إلى جنب. فهي - ولا حول ولا قوة إلا بالله - زوجته. لقد أسفرت صدمتي عن النص التالي الذي نشر في "مجلة كاريكاتير" العدد العشرون. يونية ٢٠٠٤.

إنما... عنده (مصري) تحرق الفقران بجاز

*

هي غيرة وسمسية
أو كتيبة مدفعية
حظها؛ تتاجي المراية
إنما أرحم شوية
لما بيعم السلام
لما يبهس الكلام
والمراية من قزاز
م الزبالة و(العياذ)

*

ياما في الدنيا عجائب
الحليوة واللي خايب
(درش) 'جانب (الزمبيولا)
راح تزول من بعد حين
زي قشطة فوقها طين
كره الناس في الجواز

*

الفنان التدير الذي رسم الغلاف بمنزل هذه المقطرة العالية "مصطفى حسين" أو (مصطفى) محبوب نسميه (درش) وهذا الفنان الأصيل محبوب لاني جدا.

صباح اليوم*

لما رغيـف العيش	باوصل له بالتيلة
وف ساعة التصريف	باضطر للإسعاف
واطلبها؛ ما بتجيش	و .. أنا قليل حيلة
في الحر؛ أقول يا لطيف	و البرد ما له لحاف
ومواصلاتي "حروب"	باخسر في ناديها
و(الشاشة) جسر كروب	مضطر اعيدها
والكورة و "البدروم"	بيعلوا عندي الضغط
و .. ياميت صباح اليوم	على كل أهل الشفط
لو فيه ورق مطلوب	من(رسمي)؛ لو تتبل
إما مداسي يدوب	أو يلعب (البابل) ^١
و هلم يجري (سعيد)	محزون؛ في آخر الشهر

* نشرت في مجلة (كاريكاتير). العدد "التاسع عشر". إبريل ٢٠٠٤ تحت عنوان : الأقيها منين والا منين.
^١ (البابل) هو الاسم الحركي للجنيه المصري لدى قاموس نقيب التشكيليين أ. مصطفى حسين.

مع قائمة المواعيد
القرش فيه عفريت
والدين^١ - صديقي - غتيت
يا.. مين يجيب الحل
والاقي عنده الحل
فرطت - أنا - في الأمس
بادي القفا للشمس
الـ(لاه) كانت فين ...
يا تاريخ صبح بدلين...

ويا السلف والفقر
آجي أمسكه ؛ يهرب
أما الأمل: مقلب
ويعقل الملحوس
مشروب ندم وغموس!
واليوم؛؛ حصاد (نيلة)
من قلة الحيلة
في يوم ماقلت الـ(آه)
مسخة لخلق الله؟؟!!

*

^١ الدين : المديونية.

لسان الجحش

كفاية ؛؛ تعبت
في غيبي و شبت
أنا ؛ كنت ماسك
و انت اللي سبت ...
حبال الساحة ...
و عشت البجاجة .
لسانك فلت من عقله و خبت
إذا كنت قد الكلام
اللي طالع ...
كما الجحش ؛ لما تقابله المطالع ...
فقل لي - بسلامتك -
في ساعة المواجه ...
لفين حافرة ودي ؟!
و إيه انت جبت ؟!
*

أسرار الطبّول

كل واحد فينا طفل	كل واحد فينا غول
والحياة ؛ دبابير ونحل	والعريض محتاج لطول
والدماغ صحرا ونحل	و"المثل" غير "المثول"
والنجاح؛ مش أمر سهل	واللي ناجح له عزول
ناس دماغها نص نعل	إنما بتركب خيول
ناس تفهم أي بغل	بس ماهش لاقية فول

*

الظلام والبرد أهل	لو بعاد أهلي يطول
والشتا؛ لو مرة هل	بالوفا؛؛؛ إنس السيول
الوفا ياسمين وفل	والربيع سيد الفصول
والقلوب أفراح وضل	لما تتجمع؛ وقول:
"الحياة مليانة غل	عاوزة قطرة أو غسول

والنفوس غطاها ذل
واللي يربط؛ لو يحل
عزها صابه النحول
كان وقف زحف الديول

*

لو نكون في الحق كل
لو سقينا الورد
مش حيلهنا الأكل
نبقى سقناه للذبول
خل

والخيوط محتاجة غزل
والبقر إنسانه عجل
بس مين فينا الغزول؟!
والكثير - م الناس عجول

*

شفتوا لحم معادي فجل
شفتوا ؛ والد كل نجسل
مهما كان مزروع في جهل
اللي (عنتر)؛ إينه (مئل)
زي أفعال والفحول؟!؟!
مهما كان نجله كسول
إينه - عنده - م العدول
لو ني جامعة أو ني "مول"
أهله جهلة ولاد جهول
كنا نختار الفضول
كان فريقنا صاد له جول
غيره .. يطلع ابن جهل
لو - ياناس - في الدنيا عدل
لو ماكانش بيننا ندل

*

كام عددنا؟! نمل.. نمل
يا.. عيون؛ كان فيها كحل
ليه ملينا البطن وحل
والأجل- من العيشة- مل
دا البشر لوفاق وطل
مين يقول- والدنيا ذل-
قرصته سر الوصول
في سماره الليل يطول
و الكبد حارقه الكحول
نفسه يهرب؛؛ لو يطول
ع الحقيقة.. راح يزول
اللي يصبر؛ راح ينول!!

*

لو لقيت للسوسة شغل
والوصول محتاج لوصل
يبقى مخك نص بغل
أو تشوف سمسنا قمل
دا النفاق لو لم شمل
واللي(راءه) جالها فصل
يرقع الدنيا بنعمل
والمطر بطل مطول
والنجاح محتاج (وصول)
لو حتسبح في الدهول
والنضافة ام الخلول
حبله مش ممكن يطول
"كهلبا" و"مية" و "تول"
لو يدوب؛؛ يديها فول!!

*

الوضيع؛؛ تدبيره قتل
واللي عاشوا عبط؛ هبل
والأكادة؛ ان قلت: فعل
والعيال - لو عاوزة عقل
لو دماغنا بتستغل
الجيل راح يبقى (سهل)
إنما (الطبسة) شغل
واللي عك وكله وحل
والحلل مأخوذ بهزل
"اللي شال على راسه حمل
الحرام راح، يبقى طفل
والحياء؛ مفتاح وقفل

والقتيل أين الأصول
يشتروا- في العيد- ديول
يزعلوا؛ وفيين الفحول؟!!
- هات لي ألف لمن يعول
في المناقع؛ بالأصول
والطلب يلقي الحصول
واللي يمضى (السيحلول)
سبع؛ في الغابة يجول
واللي شاف مظلوم يقول:
يمشي بيه؛ صابر حمول"
واللي ربي الطفل غول
فاهمانين؟!! والا نقول!!!

*

مساء الخير.. إغرفي *

دلوقتي.. حنقدم لكم
والحلو؛ راح نقدمه
هاتي نص كيلو حبهان...
ونص كيلو زبدة (بلدي)
وفخدة (بلدي) تكون شمورت

ما تكونشي مزنوقة في شورت
وقفص فراخ فيه فرخة واحدة
هاتي سبت؛ مليون شبت
ديكها مات؛ حاسة بوحدة
و.. نبيد- كمان- بدل الغلط

*

هاتي دماغ فحلين بصل
والتين؛ ثلاثة جرام عسل...
.. إسود (عشان دا موسمه
وتلاثة (شيف) يتقسموا

* نشرت بمجلة (كاريكاتير). العدد ١٨. مارس ٢٠٠٤

والتاني حيطير من المكان
وان جه تالتهم؛؛ لو حصل
لما الفراخ يتكلموا
حينام؛ عشان محتاج كسل

*

نجيب الفول بتاعنا
فرقه اللمون بتاعنا
والشطة - دي - بتاعتنا
تقالبني وتقعصني
...العيش؛ حنت..حنت..حنت
ولعي البوتاجاز بجلة
وعشان ما نطبخش (غلط)
...لما المرتب يتزلط ؛ ...
ونحط الزيت بتاعنا
والمح- كمان - بتاعنا
وبالشوكة- دي- بتاعتنا
وبالمقص تقصقصني...
وحذار من الغلط
الغازات فيها زلط
واللحمة غايية من زمان...
حنقول لكوا الوصفة كمان

*

هاتي ثلاث زعازيع قصب
وحطي دكها فوق داهوما
واقفلي البوتاجاز ...
أنجرت؛؛ نامي بهمة
وكيلو قشر البرنقال
وطرقعي باكوين لبنان
ولما تسخني تبقى المهمة...
فاهمة؟! والا نقول كمان

في المطار

أحبك حصار
بطاقة معايدة و ليل انتظار
وأحبك فنار
يورّي السفينة طريق النهار.
وأحبك كناري ...
وأحبك غراب ؛ ...
وأحبك حقيقة ...
وأحبك سراب ...
أحبك تيجيني على أي رحلة
لقاكي بيحلا ...
يغور الانتظار

*

مكالمة؛ بعد نصف الليل

آلو ؛ بغداد !!
خرج؟!
لسته؟!
ما هوش مستوعب الوكسة?!?!
عشان غلبان ...
ونصه لسان ؛ ...
معاه الدنيا متعاكسة!!
خلاص ؛؛ خليه ...
وبيكفيه ...
قفاه ؛ لما الكفوف تشويه
- وبكرة ...

- واصبروا لي عليه -

يولع شعلة النكسة!!

*

ليبرتي؟؟!!

(مُس) عليه تصبر ...

عشان سيرته بقت مرحاض .

لاسمك البحر طايقها ...

ولا المتربي في الأحواض.

ولا ابن الناس ...

ولا ابن هاموش ...

ما هوّاش مستعيز م البوش!!

ليبرتي ؛ قايلة إنه فاشوش ...

عشان حلمان ب .. ديكه باض!!!

*

هنا الدانة ...

هنا المزّة

هنا حطين ...
هنا غزة
هنا ؛؛ مجانين غروب الكون ...
بيمشوا مشية الوزه !!
ألو ...
يا سراية المجانين .
تعالوا قوام ...
أهم ؛؛ قاعدين .
[!!! ؟؟ !!!]
دفناهم خلاص ، في الطين
[... !!! ...]
نخلص ؟!
فكرتك فذة !!!

*

ما قلنا له ؛ بلاها جيوش ...
ولا صراصير في شكل وحوش

وما سمعنيش ؛ ...
وأسطوله ...
يجيب في سلاح ...
يودي نعوش
وكان ليه ظلم ؛ من أصله ...
وناس ؛ بالدم يتواصلوا !!
يا آخر خيبة في فصله ...
فضايحه مججلة في الحوش !!!

*

(ليبرتي) بريئة من خيبتك ...
عشان مش محترم شيببتك ...
وغلبانة ؛ اللي فيك حملت ؛ ...
دعاها : يا ريتني ما جببتك !!
ما بين بيتك و دار الناس ...
سفر أجيال على الحكمة
وخوفك من (صدى التاريخ)

مضيع - بالحروب - هيبتك!!!

*

يا (بوتشو) ...

لم أشلاءك

وخلي الحلم أخلاقك

عشان بالكبر - لو داءك -

حتقرا السطر بالمقلوب

ف... إفتح - ثاني - أوراقك

عشان ما بقاش في أسماءك

سوى شرك و أشراكك ؛

وياك تستهين بـ (الطوب) !!!

*

فانوس... شمعته الظلمة!!*

أنا الغريب في الوطن؟!
والا الوطن مغترب؟!
مين اللي خد ضحكته...
ويا رغيبي وهرب؟!
أنا صاحي في المأساة...
والا منامي كابوس؟!
إيه فايدتك يا فانوس...
إن كان طريقك خرب؟!!

*

* نشرت بجريدة (أفاؤ عربية). العدد ٦٣٠ في ٢٣ أكتوبر ٢٠٠٣

أنوبات*

عين .. شين .. راء ،
عشر الطريق .
إمتى حنرط فيها تاء؟!
إمتى تعود لغة الفريق ...
في البيت و في الشارع سواء؟!
إمتى ما نرميش القمامة
ف قلب شارعنا العريض؟!
إمتى نطبطب ع الحمامة ونطرد
الفار البغيض؟!
ونرسم الضحكة على عيون الصبية ...

* نشرت في مجلة (صوت فلسطين). ديسمبر ٢٠٠٢

وابتسامتنا تخلي العيشة
رغدة ومرتوية ؛ ...
والطابور ينشأ لوحده ...
والعجل بالخير يسير
يطلع الطالع كريما ...
ينزل النازل أمير
كلمة حلوة ...
وبسمة حلوة ...
يبدعوا أحسن نظام
إنما الأنوية بلوة
تحرق الكورة اختصام !!!

*

رباب

رباب؟! تبقى بنتي
رباب ؛؛ من دهب !!
رباب هيّ مصرف ساعات الغضب
رباب - في غضبها - بحور الزحام
لكن - في الرواق - عصير القصب ...
... رباب أحلى مئة ؛ و آخر تمام
فراشة جميلة و عنقود عنب
وزيتونة فوقها حمامة سلام.

*

رباب لما تزعل يبان الخفي
لسانها بيرسم خيال عاصفي
بتدخل أودتها .. وتقلب حاجتها

وقل : " يا رحيم ، ع الحبيب الوفي "
وأمن على كل حنة أثاث
وبلد ودانك .. وكل الحواس
رباب راح تقول؟! والا قالت خلاص؟!
وتفتح ؛؛ تلاقي الرواية العجب!!!
تلاقي دولابها نشارة خشب
كتبها غرابها ؛؛ الصقور في شبابها
بتتشر بمنقارها رجل الكنب!!
و .. تلقى هدمها كنافة بشنب!!

*

رباب ؛ أصلها - في غضبها - انفجار
رباب ، نجمة حلوة .. جفاها المدار
يا دوبك في (ثانوي)
في أولى يا (عنوي)
فهمت إنت ليه الرباب انقهر؟!
عرفت القضية ؛ واصل الخطر!؟

و إن البنية ؛ دا شيء عصب عنها
و إن المسائل ما هياش كلام؟!
رباب زهرة نادية ؛ مافيش أحلى منها
لكن عذرها ؛ الدنيا صارت زحام!!

*

وتمسي الليالي .. و ما فيش قلب خالي
وتصبح يقولوا : صباحك بكام؟!
وعبي و إملا ... عشان ترضي نملة
تلاقي البعيد ؛ الغويط انجذب
ما هي الدنيا (عملة) ... وتوزيع و جملة
ما تعرفشي جملة :
(درسنا الأدب)

*

" رباب " ؛ الرقيقة ... - ودا ؛ في الحقيقة -
في لحظة ميلادها .. ينتزل بريئة
ما تعرفش ليه ؛ الصراخ بعد لحظة

يهز القلوب اللي جاهلة السبب!!
دي حسنة بفطرة... ويا.. ألف حسنة
بان الحياة وشها من خشب!!
فقال لروحها :

"المقدر يكون
حاشيك يا دنيا على كل لون ؛
وصوتي في ساعة رضاي حمامة
وساعة الغضب يبقى بالميكروفون
ولو شيء خدشني ؛
ما حدش يحوشني
حاشيه - ب (طوبة) - يحصل رجب
أنا داخلة عالم
ومش لاقية عالم
يقول للعالم أصول الأدب "
*

كلام مع صورة

بعينيك الخضرا السحرية
والبسة التي باحارب بيها
وزعت البسة على اصحابي
ومشينا - يا أجمل أحبابي -
فوق رملة السدم بيروبيها
والروح يقول لي ف همساتك:
لعيونك باتمنى العودة
وانا جاب حبك نور أبيض
باتمنى - وشوقي في ضلوعي
لو أرجع؛؛ يبقى بحرية
باسم اللي خلقنا وعلمنا
لو أرجع ومعاي أخوي

*



كانيش رمضان

من شهر فات ؛ والتجهيزات
دايره على قدم وساق !!
نصبوا الخيام ؛ فيها الزينات :
فوانيس ...
ياميش ...
طوفان زواق !!
شفت الفانوس ؟!
نفسى فـ فانوس !!
لكن - بقى - منين الفلوس ؟؟!!
شفت الياميش ؟! حلو الياميش !!

يمشي مع الجيب الكاتيش !!!
إذا للфанوس ؛؛ مافيش فلوس ...
يبقى الياميش ؛ (فلوس) مفيش !!!
يا .. " مترو " جاي ... إعمل لي شاي
زيك ؛؛ بقي لي خط سير .
و الناس ؛؛ يا باي .. رايح وجاي
و أنا ؛؛؛؛ كل عام وانتم بخير .

*

دبوس ٢٠٠٠

الكل .. على رأس الدبوس
قاعد ... محبوس
اللي يدوس ... واللي بيجرح
شرايين ونفوس
عدينا ع العام الألفين
لكن .. بقى فين
الفرق بين إنسان واعي
وبين فحل جاموس؟!

*

كرباج وزمارة

عشان الأنس يجمعنا
ويبقى للحياة معنى
نحب الإيد تكون في الإيد
نشيد ... والعقل يسمعنا ؛
ضمير واحد على السكة
و ماتكونش القلوب فكة
ولا كرباج يفرقنا
ولا زمارة تجمعنا ...

*

فداهم

علمني الصبر بيهم	إداك ربك عيين
أسبح بسفينتي فيهم	لو سافروا في السنين
بحرين: والمية خضرا	بحرين: والشط قذرة
دي بحور والا عيين!!	قلبي بيغرق؛ ما يدرى
لو حر الشط فين؟!	لو عين: إزاي تغرق؟!
صلاحك بيناديهم	غرقان - يا حب - فيهم
لو عابوا بالسنيين	باتمنى يوم لقاهم

*

ودوني بلاد بعيدة	دي عيينك خطفوني مني
هي الجنة الجديدة	والغربة اللي في ظني
جناحتها من الثواني	شايلاني طيور أمانى
رديت للدنيا تاني	وقابلت رموش عيينك

واصبر ع الشوق واصبر
من ترتيب المعاني
وريني الشط فين
بتدرب فيهم سنيين

حرام ؛ ارجع وأفكر
في قلب حنانه أكبر
يا مبدل صبري حيرة
دي عينيك ؛ لحظة لقاهم

*

ما تخافشي على ربيعك
حتى لنفسي ما أبيعك
جبرت من طير أمين
قرب وغربة وحنين
من قبل ما يبقى فكرة
لعيون الجنتيين
واتمنى أعيش معاهم
لو غابوا بالسنيين

أنا حارس ورد حبك
أنا عمري ؛ رويته منك
لو سوق العاشقين
دهبك في القلب خالص
مكتون في فجر بكرة
وشموس طالة بذكرى
باتمنى يوم لقاهم
واروح- في الغيب- وراهم

*

لا مؤاخذه

أنا إيه؟ بكام؟
جعان وصام ...
والدنيا .. فيها الاحترام
لرصيد .. يزيد ما ينتقص!!

*

لا مؤاخذه؛ أصلي يا (مدام)
مش عارف انام ...
وهمومي لازقة على الدوام
في نبض قلبي اللي انقرص!!

*

يا شهر طال .. ولا ألف عام

بقى ده كلام؟!
لا عنب يمن ولا تمر شام
وانا ضعت ... والدنيا فرص؟!
*

لا أنا قلت قصر من الرخام
ولا ابيع كلام ...
أنا نفسي في طاجن حمام
أحكيه لصاحبي وانجعض!!
نفسي ما اشوفش ابن الحرام
لا بن الكرام ..
ناصب له فخ على الدوام
والطعم ؛ لقمة في القفص!!
*

نفسي وانا ف آخر الكلام
نبقى تمام ...
قلب الضمير عشق و غرام

مش تحت جزمة بينفص!!

*

يا عشرة .. يا ملح و إدام

واصحاب قدام ...

يا تراب رواء حب وسلام

أفديك أنا بآخر نفس.

*

ناس في الفضا ...

إحنا اللي خرمنّا التعريفة	ولبسنا الشمس النضارة
ومسحنا الهوا بالأسنيكة	ودرسنا ف جامعة (جيهواره)
وعرفنا تاريخ بابا وجدو	وإزاي كانوا بينوا ويهدوا
واحنا ينكحوا وبنشدوا	من جوزة وشيشة وسجارة

*

يا تاريخ بيقول للمستقبل

فوق كدا واصحى لي يا أبوسمبل	
الناس في الفضا وانت بنمّال	ترماي كسام رايح الحيارة؟
فلتحيا النملة والنحلة	وغراب بيزعق ع النحلة
زعلان م الكارو وم أنبغلة	ومن واحد نايم في إشارة

*

جنود الفتنة

غشيت ؛ غشوك
وكذبت ؛ خانوك
وشهدت الزور ... بالزور سجنوك
لو كنت كريم ... ما كانوش أهانوك
أولاد الذمة الخربانة

*

لما الحناكيش ... ساقوا الحرافيش
لزرايب ذلة ف مية و عيش
سكتوا الحرافيش
قالوا: فائدة ما فيش
وكفاية علينا (القروانة)
لو من غير عيش أو كان الخيش
بدل الملتوتة والقراقيش ونقول للنذل ؛ ...

إن شا الله تعيش
ما احناشي حمل الخرزانة

*

صبح "المعروف بالعز" خروف
صبحوا الملاعين ... زمامير ودفوف
صبحوا الحناكيش ... شلايت وكفوف
ودماغ الفاهم شفخانة

*

يا تراب مجروف ... يا خراب في جروف
وياجثة ناس ... محتاجة طروف
من أكفان ناس ... سارقة المصروف
وعنيها ذلة ومهانة
يا جيوش دبان ... وسلاحها لبان
بتحارب في زباله إنسان
نكبة على العالم والفهمان
والحق .. بنوا له زنزانة

*

مركب جاهلين ... لا علوم ولا دين
موانيكم زفت ؛ عشان الطين
متباع باير جاية من الصين
وبعملة هزيلة و تعبانة

*

يادي الحرفوش!! طابير منفوش!!
كذاب ؛ خراب بضمير معشوش
حتى الأسماك خلى لها رموش
وحلف وإيديه ع السمانة
قال : (فايدة ما فيش)
يبقى ما يشكيشش !!!
ويخلي قفاه صندوق بقتيش
ويعيش

- عشان ما يطول العيش -

خدّام على بابا

و... سرجانة

*

يا عم فلان

يا عم (فلان) !! إيه الأوجب؟!
والدرس صعب ...
... مش مستوعب
وكلاوي الخلق ف حصابوها
وعقدهم ... الله يحصيهـا
ورباط المخ قلت فيها
وانا قلبي ورجلي في الملعب!!

*

حفّاضات الديب

وعيونہ طاقۃ شرار	هجم الخروف ع الديب
ما يقوله حتى حمار	قال : الكلام دا غريب
وتدبح بلاسكين؟!	إزاي حكيم غابة
والفعل للملاعين!!	كدا ... تبقى شرابة
أو كشت الليّة ...	أنا.. لو خففت الديل
لنجاة .. وفوز لي	- م الخوف- دا يبقى سبيل
أنا إسمي برضه خروف	لوراح يقولوا خاف
وتخاف .. وتلبس صوف	لكن بقى لو ديب
تكشيرة الأنياب	تبقى لزومها إيه
متبعترة ع الباب؟؟!	والحفّاضات بالكوم

*

ما عنعرفش

ما تغوطش!! ما تغوطش!!!
سيب الكورة .. وسيب الماتش
يمكن لما تجيب الجون ...
تاكل علقه و ما تروحش!!
جمهورك ؛ جمهور مجنون
ما بيحزنشي و ما بيفرحش
إنما همه إن جبت الجون
أو قلشت ... يرميك بالدبش
ها ... عرفتوها؟؟ دي مش فزورة!!
دي ف أيامنا!!
" ... ما عنعرفش!!! "

*

حكاوي العجوزة*

يا اولاد بلدنا... يا شعب	فاضل كثير ع الجرد
و بيننا وبين الشتا	أربع شهور ع البرد
يعنى لافيه مصلحة	فيها فلوس أو دفا
ولا في حرق المال	مكتوب لحد الشفا
يبقى لزومه إيه	يا صاحب المصلحة؟!!
تعمل شطارة ليه	في لعبة مستصلحة؟!!
حبة أسود نايمين!!	قلب العدا صاحي
بعد النمر - في أقفاص -	بيباتوا صباحي!!
والا "البالون" ؟؟ - بردون -	.. لو كنت أقول لعبة
و "السامر" اللي ضاع	أهو راح من الشغبة

* نشرت بمجلة (الجديد). العدد ٨٥ في ١٥ يوليو ١٩٧٥

والفارس اللي اختار
- حبة خيام وحديد
لو يحرق الخيمات
في سرعة الأضواء
شفنا الحياة قرعة
أنسب مكان للنار
بتضم كل جديد -
ألفن يبقى مات!!!
ضاعت حاجات وحاجات
يا(عجوزة) في الحكايات

*

ساعة الا ربع تفوت
أموال كثير بتموت
وحكاية الخراطيم
مرة "انخفاض الضغط"
والنار تدوم حياة
والمسألة (هي)
يا (صاحب السيمة)
والتانية "مخرومة"

*

الشعب - مهما كان -
الود كسب قديم
إتبط ع الخراطيم
وأدي "البيانولا"
و"السيرك" - يا ولداه
بيخاف على ماله
والفعل راس وماله
غطاها بالقـدرة
جوه "البالون" بدره
- منه "الهوا" لله

الفيل عمل أرنبلة
وان كان ما بيننا جدع
يحكى لي ع "الأوبرا"
في جحر تعلق تاه
يبحت يا (دفتر دار)
وازاي كلتها النار!!

*

يا خوفي ؛ يوم القضا
وسببها زر خيـار
ويا خوفي من بكرة
وحريقة في شبرا
يكتب "بايد مجهول"
طايح في صحن الفول
والغرب ينقل شرق
توصل لباب الخلق!!

*

مجنون وأهبل

إن مرة قلت الحق
الناس تقول : " إ عقل "
: " حط الأيدي في الشق
تلقى الحياة أجمل "
لما - عليه - صرّيت
طردوني برة البيت
أنا قلت اموت ... وياريت
مجنون ... ومش أهبل !!!

*

فوق الجبل

سيرانين فوق الجبل
صبرهم فوق الاحتمال
عزمهم - في قلبهم ...
أعلى من قمم الجبال
والجبل ؛ للأمر سلم
صبره فاضع الصابرين
ضاققت الدنيا بآلامه
راح مسلم للأنين !!

*

سيرانين !!

سهرانين في ليالي برد
شغالين !!
شغالين لنهار وصهد
معزولين !!
معزولين ؛ والبعد وعد ...
شيء : مقدر ع الرجال
لكن ايه الوعد يعمل ويا ناس
غلبوا المحال ؟!
خططوا الصحرا مداين
خضروا الرملة جناين
خلوا صخر الأرض مية
سباحة في بحورها السفاين ؟!
*

سهرانين !!
سهرانين ؛ والسبع عامل لاجلهم
ألفين حساب

واللي خاف منه الأسامة ؛ قامته أعلى

من السحاب!!

هم مين؟! إسأل حاقول لك

هم ضلي ... هم ضلك

هم ناس دفعوا حياتهم ...

نسيوا إن الزهر فاتهم

عاشوا روح للدنيا ؛ تحيا

زهرة نادية ف كل ناحية

شربوا من رمل الصحاري

والعيون نجمتها صاحبة

كل واحد فات دياره واتحرم

من الطيبات ...

لاجل يعمل - بالكرامة - ستر لآخواته

البنات

*

حيوا حراس الأعالي ...

حيوا سكان الرمال
حيوا أصحاب العزائم
في البراري و الجبال
في المراكب : ع الصواري
و (الضفادع) في قراري
و المظلات والصواعق
و الجنود ؛ شرق و شمال ...
و الجنوب و الغرب لما ...
يطلعوا زي الهلال .
*

تسألوني :
إيه دا كله؟!
كل دا سعر السلام!!
سعر لحظة واحدة صافية ...
فيها تسهر أو تنام
تسألوني :

ليه دا كله؟!

كل دا - و من غير جدال -

وعدهم ...

و الوعد (سيرة) ؛ و شيء

مقدر ع الرجال.

*

ربع ... ونص

* صباح الخير يا "بورصة"

** صباح النور يا "برص"

* بيقولوا : إنت خرسا

** أبدا .. هم اللي خرس

ودانهم ؛ طشت قال لي

.....
تعالى يا حلوة ... يا اللي

.....
إندي للشوق ؛ وعلي

يا تعيشي ربع نص!!

*

مش قادر

أهواك عصور انتقضت
واهواك زمن حاضر
صبري .. خياله انفلت
علي بكرة!! لو فاكرو!!
كان (أمس) قبل الأوان
(بكرة) في عمر الزمان
نفسى أصونه ف مكان
يا خسارة ...
مش قادر!!!

*

ميزان الوقت

وإنت في ساعتك نمر	أنا .. ساعتني فيها عقارب
وإنت بتبدأ سفر	أنا.. طول حياتني تجارب
وغروب وغربة وغريب	وغرابة يعني اغتراب
للي سلاه الطيب	أما القراية ؛ اقتراب
من بين خطوط القدر	واللي انكتب راح يصير
بالعقل ؛ عدي الخطر!!!	والخوف مجاله عسير

*

صبر الديك

حبيبي؛ لايهمه منبه

ولا (جرينتش) ولا (البيج..ين)

إن رنوا- زي- ف ساعة واحدة

اللي يرن ؛ يسييه يرن

لو نام يومين في اليوم؛ لا بأس

لو يبقى جنبه ضرب رصاص

للنوم- حبيبي- آخر إخلاص

مع إنه مش شايف في السن

*

حبيبي؛ لو شغال سواق

على اللي راكب قول: يارحيم

لكن برغم النوم؛ أخلاق

عيونه شعر وقلبه كريم

ولو انه لو يبلع طنين
حبوب نشاط؛؛ للفرش يحن
عليه رموش؛ ماتفكش عين
لو جنبه جن؛؛؛ ينام الجن

*

أروح له في الموعد ولهان
يقولوا راح من ساعة في النوم
ياريت عداني بنومه عشان
ما اسهرش وحدي بعين محروم
تعبان؛ وآخر صبر الديك
بدل ما يدن بقى بيون
ودماغه من كتر الشرايبك
يتمنى لو فيه نحل يزن

*

كلام .. على حصيرة صيف*

قصص ... روايات
عبر ... حكايات
عظات ... أمثال
ربابة ... سطور
خدوش في السور
نقوش بالشعر في الموال
كلام منظوم
كلام منثور ؛ ...
عبيط محظوظ ...
بطل منصور ؛ ...
بداية كل شيء في كتاب :
(كتاب الكون)

* نشرت القصيدة هذه بالعدد الرابع - أبريل ٢٠٠٣ من مجلة
(المنصورة).

كتاب ؛ يجمع الأعراب
في عطر و لون ...
نسيم الصبح أغنية ...
غنية بالرموز و الشرح ؛
شجون أو فرح
وشكل الطرح ع النخلة ...
و آلام الجرح ...
و ضحكة على وش العجوز والشباب ؛ ...
غناوي حب
وبتمنى البنات بالعرس ؛ ...
عرب أو فرس
وليل يبطول ...
عجم و مغول
وحتى الغول ...
ذكر ؛ ولا بد له أنثى
و لا تنس ...

الهوى غلاب
عتيق - إن كنت - والاشباب ؛ ...
بقلبك تشتري وردة ...
لحبك ؛ تنتظر ع الباب ...
عشان طلة ؛ ...
عطش يتملا في القلة ؛ ...
فقير ؛ نفسه في كيلو كباب
كدا الأحاب!!

*

وحبك للشرف والعرض
تبيع دمك ؛ عشان الأرض
وتغزل م الغناوى توب لرايتك...
أوقميص محبوب
يرفرف ؛ نور و مستقبل
في قصة حب ...
في المعمل ...

في مدفع ع الحدود ؛ ساكت
ولما ساعته تيجي ، يون
دا برضه فنّ !!
وكلمة ظريفة ؛ تتطقها ...
إذا ترميها في هدفها ...
بتبني سلام
وتروي غرام
و ثدي الأم ليها يحنّ
ويرضع ابنها الكلمة ...
عظامه تتبني حكمة ؛ ...
وفي المشاوير ...
كبير و صغير ...
طويل و قصير ...
ماهيش بالطول ولا بالسن
لكن بالحب في شكله ...
و بد الظلم ومشاكله ...

ونور العلم ...
لما الحلم يتحقق ونبقى كبار
وما يكونش الأمل سمسار
وراكبه دولار ...
وهو بيركب الموجة ...
في سكة مبهوكة ؛ عوجة ؛ ...
ببغل هزيل
وفي المواويل :
ربابة ؛ في ربيع راوي
و (راوية) وقلبها الهاوي
لإبن العم
سليل الدم
وقصة (ناعسة) مع أيوب ؛ ...
وفاء بيدوب ...
في صورة طفل مرسومة بكف
جنان ؛ ...

و غية سطورها بالألوان.
وأنا .. وانتَ ...
ويومنا و ...
حلم بالملايين!!
ثواني - في الزمن - طائرين ؛ ...
قصص ... روايات
عير ... حكايات
ساعاته الأربعة وعشرين!!
عظات ... أمثال
ربابة ... سطور
خناقة يفضّتها عاقلين!!
غناوي و نور
وليل مستور ...
وسانرنا ...
فقير دُقّة ؛ بيكوي الصبر .. بالموال
وصاحب مال ...

و (كاتب) ؛ نص عيشه عذاب

همومه ؛ كتاب!!

و أغلى كتاب :

(كتاب الكون)

كتاب ؛ سره ما بين حرفين :

في حرف الكاف و حرف النون

كتاب ؛ لما ينتغرب ...

سطوره تقرب الأعراب!!!

نقول ثاني قصيدتنا ؟!؟!

بلاش ؛؛؛ ...

العسكري ع الباب !!!

أشوفكم " أمس "

و ياريتنا - في بكرة -

نلتقي أحباب

*



ميديا

(الميديا) قالت : يا مغرض
إنت اللي مخك تخين
ليلنا و نهارنا بنعرض
تقدر تقول لي أنت فين؟! "
أنا؟! ...
رحت أصبّح صوابعي ...
واقليها؟؟؟ دا (الزيت كثير)
حفرت حوافر حصاني
حفرة تغطس سرير !!
*

السكة فين يا ابن إيني ...
إذا و احنا - في (عصر) إيني -
البغل حاطط حوافره ...
فوق الأمل والضمير !!!

*

تکاتیک

شرَبوك .. صعلوك

هالك .. مهلوك

زيّ المكوك ..

شغلّه (الدوران)

*

بيحب الصيد

ويلم البيض

وعشوش الطير

نصّها خربان

*

مالك يا فكيك؟ فين التكتاتيك؟!
فين الفراكيك؛ فين الألوان؟!!
قل لي يا ممدوح "كان فيه كام لوح
في سفين البوح ملزوق بلبان؟!!!!

*

كانوا كام عاقلين.. زي المجانين
راكبين.. سايقين هبل الشيطان؟!
عالم كشاكيل؛ براميل ونخيل
بحوافر خيل وعقول دبّان!!!!

*

نداء في الفجر*

يا رب .. ليلة القدر	تجي علينا سلام
من بعد طول الصبر	تتحقق الأحلام
يارب بارك لنا	في المعنى والملموس
نجينا من نفسنا	واللي ما بيننا سوس
يارب زبح الغلا	عن لقمة المساكين
لما الجنيه ابتلى	من هدره الملايين
خلي نفوس البشر	صافية صفاء السما
والعين ؛ يفيدها الجزر	علشان تشوف النما
واحمي في(مصر) الثرى	واحمي الرضيع والأم
والحقد يرجع ورا	وما نشربوشي سم
إهدي البشرع البشر	واهدى الحمارع الضبع

* نشرت في جريدة (الأخبار) - العدد (١٥٧٨٦). بتاريخ ٢٩
نوفمبر ٢٠٠٢.

واللي ضميره اتعصر
واللي سلاحه لسان
عن سكة الإيمان
يارب خلي الطفل
يفهم ؛ ما يبقاش قفل
واكفينا شر الجمل
وابني يلاقي عمل
أرجوك؛ ما تتكبناش
اللي ضميرهم كاش
يارب ؛ خلي (مصر)
ويعدوا فوق الجسر
إحنا عصينا؟! نعم !!!
وانت وليّ النعم
خلي - يارب القدر -
واقبل ندا في الفجر

واللي في عقله ربع
واللي عماء الكيف
واستوطن التخريف
لما يروح مدرسة
حالف على التريسة
لما يبيض في سراب
وهو لسه شباب
بغياوة السفهاء
خالي من الأخلاق
وأهلها في سلام
بالفعل .. مش بكلام
خلينا عيشنا خل
اللي في إيده الحل
باب السماء مفتوح
طالع من المجروح

*

البحر .. قد البحر

يا أمّ الشعر ليلة ...
أنا احبيب منين حيلة ...
واحكى السهر لليل ...
وانسى العذاب والويل
خُطّ (الحكاية) حنين
وارخي ستاير الليل
والبدر شايلهـا
علشان أطولها ...
والنور يغطيـني ...
واملا بسماء عيني؟!
إحكي لي أولها
علشان (نطولها)

*

شربت بحر الصبر
ما البحر قد البحر
على شطّه قابلتك ...
واحترت في حيلتك
هاتي القمر والليل
وياريت ستاير الليل
طب ليه أنا عطشان؟!!
والقلب زي زمان!!
قمرة وشايلة الليل
والصبر باله طويل.
والخيل وخيالها
نقدر نطولها!!!

*

لكن ؛ ما نقدر شي
والليل وأقماره للناس...
عشك على ليله...
ليلك في بحريني
قالوا: "الساعات بتدور"
ليالتا ليها دهور ؛
لازم الزمن يمشي
لكن رمشي
لنا ليل ؛ وليهم ليل
- في عيوني - نجمه جميل
خليها في حالها
لسه في أولها !!

*

لعب الكشكش

أيوه؛ الدائرة شكل رباعي
حداشر زاوية وست اضلاع
والدنيا؛ خاتم في صباعي
ولو الكف ما فيهش صباع
علشان أنا في الحيط متداري
ولو ان الحنفية مجاري
أنا متوفق مع صرصاري
في رغي في.. ف.. بلاش أوجاع
وفر صوتك لما تشاكس
وابقى حريص قوي؛ لما تعاكس

أصل (القِسْم) مالوش في الحكمة
يعني سيادتك ؛؛ لابس.. لابس
يبقى الأحسن ؛ (تلفز) نفسك
وغباوتك ، إفرشها متاع
واشطب أحلامك من أمسك
بيك؛ من غيرك.. "بالإجماع"
عاوزك مرة- بزمة- تقول لي
في الأتوبيس؛؛ فين السواق؟!؟!
لما تكون الطرحة التللي
سودة ؛ ولونها في الأخلاق؟!
واللقمة ؛ طبال وعوالم
وبتاعه بتخدع في بتاع؟!
وازاي ينجح- فينا- العالم
واحنا الواحد؛ ست ارباع؟!
ما تضيّعش الليلة وولي
راح تتأخر على (رَشَوَات)

بعد ما نرجع تبقى تصلي

ل (كويزا) تزعل م (الجات)

وانا وانت... وزمر يا (مناخلي)

بلا قرابة بلا طباع

لا تقول "سخلي"... ولا تقول "تخلي"...

الدنيا: صراصير وضباع

أنا؛ مش تبع النعش الطاير

ولا صاحب عبد الجبار

لكن الحق ما فيهشي دواير

إنما خط و بعده النار

ونهار المزنوق مع طبله زي الليل...

وسريـره مشاع

ومادام لعب الكشكش طاب له يسكت...

ما احناش حمل صداع!!!

*

بنات البحر

قولي لي فين رايحة ...
- يا .. طيرة ؛ في الصيحة -
والبحر مش مأمون ...
والعمر مش مضمون ...
والناس سماها عيون ...
في الجاية والرايحة!!؟

*

خليك في الإحساس ...
- عندي -
قمر وناس
مالنا و مال الناس ؛ ...
والساكتة و البايحة!!!؟؟

*

هاتيني ...
وذيني ...
فارقيني ...
ضميني ...
لو سافر المعذور
- قلبي - فـ مياديني ...
إستني !!! بكرة يعود ...
في صرخة المولود ...
أو في خضار العود ..
صرخة مع الفرحة ؛
وعين الأمل يرحة ...
تهدم جدار السور ...
الباهت المغرور ...
لو - في الغرام - مسطور ؛
أو بند في اللايحة !!!
*

على موتى*

في حب مصر أدوب
وأقطف ثمر صوتي
واعشق حجارة وطوب
والحسن في خطوطي
أهواها عالية لفوق
ما يهزهاش عتريس
لو طالها أي خسيس...
يبقى على موتى

*

* نشرت بمجلة (كاريكاتير). العدد ١٥. يوليو ٢٠٠٣

﴿١٣٦﴾

باب الهوى مقفول

قالت له: يا .. دهري لما انحنى ضهري
طردوني أهل الحي
أنا؛ كان زمان ميري - في الليلة يا.. قهري
تلاتين جنيه وشوي
يا اللي منادياني حنقوها من ثاني؟!
العين هراها الغي
إن كنت من بختي فالعمر ضاع؛ يا اختي!!
باب الهوى مقفول
لو كنت ضيعتي عمرك وجمعتي
حزنك؛؛ مانيش مسئول
بتقولي : يومك قير.. من طوله؛ أصبح شهر...
والصبر زي الغول؟!

راح فين جمال التّحر وجزايره فوق البحر
... اللي من القشّة!!
دلوقتّي ؛ لا عطّار يقدر ... ولا نجّار
ولا حيلة الماشطة..
تقدر تعيد السور للعالم المسحور
في الحلم ؛ أو بالسّحر
وانا؛ والدّراع مكسور وحابسني في المقدور
لازم أعيش في الجُحر
ياقطة
يعني مافيش فايده ؛ في ليل الطّيش
سامحيني ؛ مانيش جايّ
لما السمك تاكليه تقلّيه ؛ يا إما أشويه
يعيبك ؛ لو كان ني

*

في العارضة

عشان الدنيا في الخردة
.. رسمنا الدم بالوردة
و.. جوّزنا القمر نسناس
و.. حلو الناس خطب قردة
لا بد نشقلب الأهمّـرامـ
و تيجي الكورة في العارضة!!!

*

تباديل

وقالوا : نزيل الأنوار
ونكسر عين ولاد (سالمه)
ف... شبت في الفاتورة النار
فلا واعظ
ولا عالمة!!
وأهل الدار ؛ طفوا الأنوار
وزاد تعدادنا (ست عشار)
فقالوا ؛ يركبوا عداد
يعدّ" العشق في الظلمة !!!

*

سايكس عربيكو

حملت المآسي يا ...
قطر الفراق
ما بين مكر ماسي ولؤلؤ
خناق
في عيني القضية ...
- لكن مستحيّة
(فلسطين) في نني ...
ونتي (العراق)
وكل الديار اللي راحت في ساعة ...
ما بين أهل ثومة ؛ وأهل الوضاعة ...

وظرف السياسة ...
وقرص المجاعة ...
و (جامعة) بترسم في هيكل وفاق !!!
ولا حد قايم ؛ مصحّي اللي نايم ...
ولا فيه (غريقة) تهمّ اللي عايم ...
وكل اللي رايع يقوّي الرّوابط ...
بياخذ شهادة :
(مافيش اتفاق)
وإذا (هيك) شهادة ؛ ...
فـ ... تبقى الشهادة ...
عداوة ؛ تعزّز عيون البلادة ؛ ...
فـ ... إيه - يعني - حاعمل
لوحدني ؛ يا (سادة) ...
وانا ضفر إصبع ؛ ...
وفي الكف داء ؟؟؟!!!!
*

العيد؟! على الشمال!!

يا ترى ؛ يا (عيد)
عيد الورم ؟!
والا (الأوزون) اللي اتخرم ؟!
والا ابن ناس ...
- تحت المداس -
منداس ؛ وكان - يوم -
محترم؟!
والا انت صفر على الشمال؟!
والا انت زمارة عيال ...
في دنيا مال ؛ يوم ...
حالتها مال ...
لما الجنيه أكل الصرم?!

والا انت تباع ميكروباس؟!
والا انت بمباية في راس؟!
والا صاروخ هجص وخلص؟!
والا حياة زي العدم؟!
والا انت من بحر الجروح؟!
والا حجر و مالکش روح؟!
والا ابتسامة ف وش لوح
مفروض رقبتہ تتقطم!!

*

على أي حال ...
" أهلا يا عيد "

لو بالجراد ...
أو في الحديد ..
أو ركنه في الخط البليد ...
أو حق مبتور القدم!!!

*

عرض الصلح

عايز اصطلح وياك
يارب ؛ خد ايدي
لما عصيتك - يارب -
صار الذنيء سيدي
و اللقمة فيها العسل ؛
لكن عسل بالسم
ساكن مسار الدم
... شرياني ووريدي.

*

عايز اغتسل - يارب -
بالتوبة ؛ في الأنوار
اقلني ؛ اغفر ذنوبي

دا انت حليم ستار
أنا عارف ان البحر
غرقان في عصياني
لكن اتساع رحمتك
أملني ... وإيماني
بأن وعدك حق ...
... والجسر توحيدني
عايز اصطحب وباك
يـارب
خد إيدي.

*

المحتوي

تسلسل	النص	الصفحة
-	إهداء	٥
-	تقديم د. يسرى العزب	٧
١	هو الملك	٩
٢	لو موافق	١١
٣	حاجة كويسة	١٢
٤	رحلة على محيط الدائرة	١٤
٥	سيب القلقاساية	٢٠
٦	حبيبتى .. تبقى مين؟!	٢١
٧	فروق بسيطة	٢٢
٨	ساعة غروب	٢٣
٩	بارالامو	٢٥
١٠	ميكروبس كفر الهتل	٢٧
١١	حليب المكاحل	٣١
١٢	الريشة .. مش قوي	٣٢
١٣	فراشات النار	٣٣

٣٦	مش حكاية قماش	١٤
٣٧	شوطة	١٥
٤٦	يامين يعيش	١٦
٥٠	مدارس الجواسيس	١٧
٥١	ضفاير الصنصاف	١٨
٥٣	و ... هات يا صويت	١٩
٥٩	القشطة و الطين	٢٠
٦١	صباح اليوم	٢١
٦٣	لسان الجحش	٢٢
٦٤	أسرار الطبول	٢٣
٦٨	مساء الخير ... إغرفي	٢٤
٧٠	في المطار	٢٥
٧١	مكالمة؛ بعد نص الليل	٢٦
٧٦	فانوس ... شمعته الضلعة	٢٧
٧٧	أنويكات	٢٨
٧٩	رباب	٢٩
٨٣	كلام مع صورة	٢٠
٨٥	كاتيش رمضان	٣١
٨٧	دبوس ٢٠٠٠	٣٢
٨٨	كرباج و زمارة	٣٣

٣٤	فدامم	٨٩
٣٥	لامواخذة	٩١
٣٦	ناس في القضا	٩٤
٣٧	جنود الفتة	٩٥
٣٨	يا .. عم فلان	٩٨
٣٩	حقاضات الدتیب	٩٩
٤٠	ما عنعرفش	١٠٠
٤١	حكاوي العجوزة	١٠١
٤٢	مجنون وأهبل	١٠٤
٤٣	فوق الجبل	١٠٥
٤٤	ربع ... ونص	١١٠
٤٥	مش قادر	١١١
٤٦	ميزان الوقت	١١٢
٤٧	صبر الديك	١١٣
٤٨	كلام ... على حصيرة صيف	١١٥
٤٩	میدیا	١٢٣
٥٠	تکاتیک	١٢٥
٥١	نداء في الفجر	١٢٧
٥٢	البحر ... قد البحر!!!	١٢٩
٥٣	لغب الكشكش	١٣١

١٣٤ بنات البحر	٥٤
١٣٦ على موتى	٥٥
١٣٧ باب الهوى مقتول	٥٦
١٣٩ في العارضة	٥٧
١٤٠ تبديل	٥٨
١٤١ ساكس عريكو	٥٩
١٤٣ العيد؟! على .. الشمال	٦٠
١٤٥ عرض للصلح	٦١

صدر من مطبوعات الفجر

١	تغريبة عززاق الهلالي	دrama شعرية	د. يسري العزب
٢	الهاموش	قصص	حسن نور
٣	المبعدون	قصص	إبريس علي
٤	حكايات مصرية	قصص	د. نجدي إبراهيم
٥	الدائرة	رواية	د. نجدي إبراهيم
٦	شجرة مريم	شعر	د. يسري العزب
٧	تأملات في الفن والثقافة	نقد	د. محمد حسن عبدالله
٨	أمميات عائلية هادئة	قصص	منتصر ثابت
٩	شجر الليمون	شعر	خالد الشوقاتي
١٠	عصفور الحب	شعر	نجاحة خليل
١١	حتى لا يطول الانتظار	قصص	محمد نور الدين
١٢	اكتب عمري	شعر	ليلى محمد علي
١٣	زائر بعد منتصف الليل	رواية	منيرة أبو زيد
١٤	خاطنة في الجنة	رواية	يحيى سليمان
١٥	النملة والحداية	شعر للأطفال	عزت زايد
١٦	واحد اثنين	شعر للأطفال	عزت زايد
١٧	المراهن	رواية	سيد أمين
١٨	فيكي إيه يتحب؟!	شعر	جلال صباد
١٩	فرس جامح	شعر	ليلى محمد علي
٢٠	حريم الملح والسكر	مسرحة	محمد الغنيطي
٢١	قمر المغارب	شعر	د. يسري العزب
٢٢	الدنيا جاية	شعر	د. فاطمة الحفني
٢٣	أه يا وطن	شعر	منى عوض
٢٤	تخاريف	شعر	نبيل أبو السعود
٢٥	ليلة دافئة	قصص	فرج محمود
٢٦	ضاع الطريق مننا	شعر	عبد الحميد فرج
٢٧	بشرة خير	شعر	مجدي حمودة
٢٨	بين الضفتين	رواية	فرج محمود
٢٩	انت عنواني	شعر	منى عوض
٣٠	الشاطيء البعيد	رواية	عبد الباسط أحمد
٣١	في العارضة	شعر	سيد علي عبدالله

رقم الإيداع	: ٢٠٠٥/١٧١٩٧
الترقيم الدولي I.S.B.N.	: 977-17-2612-9

زود للطباعة والكمبيوتر

حقوق الملكية الفكرية والطباعة والنشر
محفوظة للمؤلف